



ҚАЗАҚСТАН РЕСПУБЛИКАСЫНЫҢ
ҰЛТТЫҚ БАНКІ
№9 БАСПАСӨЗ Р Е Л И З І

2011 жылғы 10 мамыр

Қаржы нарығындағы ахуал туралы

1. Инфляция

Қазақстан Республикасы Статистика агенттігінің ресми деректері бойынша 2011 жылғы сәуірде инфляция 0,5% (2010 жылғы сәуірде – 0,7%) деңгейінде қалыптасты. Азық-түлік тауарларының бағасы 1,0% (1,0%), азық-түлікке жатпайтын тауарлар – 0,2% (0,4%) және ақылы қызмет көрсету – 0,0% (0,4%) өсті.

Азық-түлік тауарлары нарығында өткен айда көбінесе жұмыртқа – 3,4%, қант – 2,1%, ет және ет өнімдері – 1,3%, кондитерлік бұйымдар – 1,2%, нан және жарма өнімдері – 1,1%, оның ішінде жарма – 3,6% және бидай ұны – 1,3%, май және тоң майлар – 1,0% қымбаттады. Күріш 0,4% арзандады.

Азық-түлікке жатпайтын тауарлар тобында бағалар бензинге - 0,4%, дәрі-дәрмектерге және киім мен аяқ киімге - 0,3% өсті. Дизель отынының бағасы 0,8% арзандады.


Ақылы қызмет көрсету құрылымында тұрғын үй-коммуналдық саланың қызмет көрсетуі үшін ақы төлеу 0,1% (суық суға ақының төмендеуі есебінен – 1,2%) арзандады. Бұл ретте электр энергиясы үшін ақы өзгерген жоқ, ыстық су және орталық жылыту 0,7%, кәріз үшін - 0,2% төмендеді. Амбулаторлық қызмет көрсету 0,3% қымбаттады.

2011 жылғы қаңтар-сәуір үшін инфляция 4,2% (2010 жылғы қаңтар-сәуірде – 3,6%) болды.

Ағымдағы жылғы 4 айда инфляция қарқынының жедел дамуына азық-түлік тауарларының қымбаттауы себепші болды, олардың бағасы осы кезеңде 7,1% (2010 жылғы қаңтар-сәуірде – 4,7%) өсті. Азық-түлікке жатпайтын тауарлар 1,2% (1,6%) және ақылы қызмет көрсету – 3,7% (4,1%) қымбаттады (1-график).

1- график

2010 және 2011 жж. қаңтар-наурызындағы инфляция және оның құрамдас бөліктері



2011 жылғы сәуірде инфляция жылдық көрсетуде 8,4% (2010 жылғы желтоқсанда – 7,8%) болды. Азық-түлік тауарлары 12,5% (10,1%), азық-түлікке жатпайтын тауарлар – 5,1% (5,5%), ақылы қызмет көрсету – 6,4% (6,8%) қымбаттады.

2. Қазақстан Республикасының 2011 жылғы 1-тоқсандағы төлем балансы (алдын ала нәтижелер)

Төлем балансын алдын ала бағалау бойынша ағымдағы операциялар шотының профициті 2010 жылғы 1-тоқсанмен салыстырғанда 74,4% ұлғая отырып, 2011 жылғы 1-тоқсанда 4,8 млрд. АҚШ долл. құрады.

Ағымдағы операциялар балансының айтарлықтай жақсаруы тауар экспорты құнының энергия тасымалдауыштардың әлемдік бағаларының қолайлы конъюнктурасына байланысты өсуімен қамтамасыз етілді. Орташа алғанда 2011 жылғы 1-тоқсанда Brent сұрыпты мұнайдың әлемдік бағасы бір баррель үшін 104,90 АҚШ долл. құрады, бұл оның 2010 жылғы 1-тоқсандағы орташа деңгейінен (бір баррель үшін 76,65 АҚШ долл.) 36,8% жоғары. Нәтижесінде тауарлар экспорты 2010 жылғы 1-тоқсанмен салыстырғанда 35,8% ұлғая отырып, 2011 жылғы 1-тоқсанда 18,5 млрд. АҚШ долл. құрады. Бұл ретте тауарлардың ресми экспорты 18,3 млрд. АҚШ долл. құрады.

Тауарлар импорты 31,2% ұлғая отырып, 7,4 млрд. АҚШ долл., оның ішінде ресми импорт 6,7 млрд. АҚШ долл. құрады (2010 жылғы 1-тоқсанда 5,4 млрд. АҚШ долл.). Бұл ретте 2011 жылғы 1-тоқсандағы тауарлардың ресми импортының деректері Кеден одағы елдерінен импорттың 2010 жылғы 1-тоқсанмен салыстырғанда 46,7% ұлғайғанын көрсетіп отыр.

Тұтастай алғанда сауда балансы 2011 жылғы 1 тоқсанда алдын ала деректер бойынша 2010 жылғы 1 тоқсанмен салыстырғанда 11,1 млрд. АҚШ долл. оң сальдомен қалыптасып, 39,1% өсті.

2011 жылғы 1 тоқсанда қызмет көрсету балансының дефициті 1,4 млрд. АҚШ долл. қалыптасты, іс жүзінде базалық кезеңдегі деңгейді сақтады. Бұл ретте есепті кезеңде қызмет көрсету экспорты да, сондай-ақ қызмет көрсету импорты да аз ғана, тиісінше 5,7 және 2,8% өскені байқалды.

Тауарлар экспортынан түсімдердің ұлғаюы салдарынан экономиканың тиісті салаларында шетелдік тікелей инвесторлардың кірістері өсуді жалғастыруда. Шетелдік тікелей инвесторларға төлемдер 35,6% ұлғайып, 4,5 млрд. АҚШ долл. жетті (2010 жылғы 1 тоқсанда 3,3 млрд. АҚШ долл.). Тікелей инвестициялау қатынастарына байланысты емес кредиторларға сыйақы төлеу сондай-ақ 17,5% өсіп, 0,7 млрд. АҚШ долл. болды. Нәтижесінде, 2011 жылғы 1 тоқсанда инвестициялық кірістер балансының теріс сальдосы алдын ала бағалау бойынша 2010 жылғы 1 тоқсандағы 3,5 млрд. долл. салыстырғанда 4,7 млрд. АҚШ долл. болды.

2011 жылғы 1-тоқсандағы қаржы шоты бойынша нетто-ағын 3,7 млрд. АҚШ долл. қалыптасты. Бұл ретте шетелдік тікелей инвестициялардың (ШТИ) Қазақстанға таза түсуі 3,2 млрд. АҚШ долл. (2010 жылғы 1-тоқсанда 3,4 млрд. АҚШ долл.) болды. Шетелге тікелей инвестициялар бойынша 0,7 млрд. АҚШ долл. нетто-ағын қазақстандық кәсіпорындардың өздерінің шетелдегі филиалдарындағы акционерлік капиталының өсуімен қамтамасыз етілді. Нәтижесінде, тікелей инвестициялау операциялары бойынша оң баланс 2011 жылғы 1-тоқсанда 2,6 млрд. АҚШ долл. болды.

Портфельдік инвестициялардың балансы Ұлттық қордың шетелдік активтерінің 2,1 млрд. АҚШ долл. астам өсуімен, сондай-ақ резидент еместердің қолындағы Ұлттық Банктің қысқа мерзімді ноталары көлемінің 2,3 млрд. АҚШ долл. жуық ұлғаюымен сипатталады. Бұдан басқа, 2011 жылғы 1-тоқсанда қазақстандық банктердің еурооблигацияларының жаңа шығарылымы нәтижесінде банк секторы міндеттемелерінің 0,7 млрд. АҚШ долл. астам сомаға өсуі байқалды. Сонымен бірге бұрын шығарылған еурооблигациялар бойынша міндеттемелерді өтеу көбінесе банктердің портфельдік инвестициялар бойынша міндеттемелерінің ұлғаюымен жойылды – банктердің міндеттемелерінің өсімі 0,2 млрд. АҚШ долл. аз болды. Тұтастай алғанда, портфельдік инвестициялар бойынша нетто-ағын небәрі 63,0 млн. АҚШ долл. болды.

3. Халықаралық резервтер және ақша агрегаттары.

2011 жылғы сәуірде Ұлттық Банктің халықаралық резервтері ұлғайды. Ұлттық Банктің жалпы халықаралық резервтері 37,0 млрд. АҚШ долл. дейін 5,1%-ға өсті (жылдың басынан бастап – 30,7%-ға өсу). Ұлттық Банктің таза халықаралық резервтері 5,1%-ға ұлғайды және 36,4 млрд. АҚШ долл. (жылдың басынан бастап – 31,4%-ға өсу) болды. Ішкі валюта нарығында валюта сатып алу, Үкіметтің Ұлттық Банктегі шоттарына валютаның түсуі Үкіметтің сыртқы борышына қызмет көрсету және Ұлттық қордың активтерін толықтыру жөніндегі операциялармен ішінара бейтараптандырылды. Бұдан басқа банктердің Ұлттық Банктегі шетел валютасындағы корреспонденттік шоттарындағы қалдықтары төмендеді. Нәтижесінде таза валюта активтері (ЕАВ) 2011 жылғы сәуірде 5,0%-ға өсті. Алтындағы активтер оның бағасының әлемдік нарықтарда өсуі есебінен 7,0%-ға өсті.

2011 жылғы сәуірде еліміздің халықаралық резервтері Ұлттық қордың шетел валютасындағы активтерін (алдын ала деректер бойынша 36,0 млрд. АҚШ долл.) қоса алғанда 5,9%-ға өсіп, 73,0 млрд. АҚШ долл. құрады (жыл басынан бастап 24,0%-ға өсу).

Ақша базасы 2011 жылғы сәуірде 3,4%-ға кеңейді және 2906,5 млрд. теңге болды (жылдың басынан бастап 13,0%-ға кеңею). Тар ақша базасы, яғни екінші деңгейдегі банктердің Ұлттық Банктегі мерзімді депозиттерін есептемегендегі ақша базасы 0,1%-ға 2350,1 млрд. теңгеге дейін шамалы тарылды.

2011 жылғы наурызда ақша массасы банк жүйесінің таза сыртқы активтерінің және ішкі активтерінің өсуі есебінен 3,7%-ға 8923,9 млрд. теңгеге дейін өсті (жыл басынан бері – 4,4% өсті).

2011 жылғы наурызда айналыстағы қолма-қол ақша көлемі 0,5% өсті және 1097,1 млрд. теңге болды (жыл басынан бері – 4,5% төмендеді), банк жүйесіндегі депозиттер 4,2%-ға, 7826,7 млрд. теңгеге дейін өсті (жыл басынан бері – 5,8% өсті). Ақша массасы құрылымындағы депозиттердің үлесі айналыстағы қолма-қол ақшаның өсу қарқынымен салыстырғанда депозиттердің өсу қарқынының алда болуы салдарынан 2011 жылғы ақпандағы 87,3%-дан 2011 жылғы наурызда 87,7%-ға дейін өсті.

Ақша мультипликаторы 2011 жылғы ақпандағы 3,27-ден 2011 жылғы наурыздың қорытындысы бойынша 3,18-ге дейін төмендеді, бұған ақша массасының өсу қарқынымен салыстырғанда ақша базасы кеңеюінің неғұрлым жоғары қарқыны себепші болды.

4. Валюта нарығы

2011 жылғы сәуірде ішкі валюта нарығындағы ахуал тұрақты күйінде қалды. Бір айдың ішінде теңгенің АҚШ долларына қатысты бағамы 1 доллар үшін 145,28–145,81 теңге ауқымында өзгерді. 2011 жылғы сәуірде теңге 0,1% нығайды және айдың аяғында теңгенің биржалық бағамы 1 доллар үшін 145,54 теңге болды.

Сәуірде Қазақстан Қор биржасындағы биржалық операциялар көлемі қосымша сауда-саттықтағы мәмілелерді ескере отырып наурызбен салыстырғанда 15,1% азайып, 6,0 млрд. АҚШ долл. болды. Биржадан тыс валюта нарығында операциялардың көлемі 11,9%-ға артты және 3,7 млрд. АҚШ долл. құрады.

Тұтастай алғанда ішкі валюта нарығындағы операциялардың көлемі 11,5% төмендеді және 9,7 млрд. АҚШ долл. болды.

5. Мемлекеттік бағалы қағаздар нарығы

2011 жылғы сәуірде Қаржы министрлігінің мемлекеттік бағалы қағаздарын орналастыру бойынша 4 аукцион болды. Оларға 12 айлық МЕККАМ (14,8 млрд. теңге), 2 жылдық МЕОКАМ (15 млрд. теңге), 12 жылдық МЕУКАМ (15 млрд. теңге), 12 жылдық МЕУЖКАМ (4 млрд. теңге) орналастырылды.

Орналастырылған бағалы қағаздар бойынша тиімді кірістілік 12 айлық МЕККАМ бойынша – 1,62%, 2 жылдық МЕОКАМ бойынша – 2,26%, 12 жылдық МЕУКАМ бойынша – 5,30%, 12 жылдық МЕУЖКАМ бойынша - инфляция деңгейінен 0,01% жоғары болды.

Қаржы министрлігінің айналыстағы бағалы қағаздарының көлемі 2011 жылғы сәуірдің аяғында алдыңғы аймен салыстырғанда 0,9% өсіп, 1768,6 млрд. теңге болды.

Қазақстан Ұлттық Банкінің қысқа мерзімді ноталары. Ұлттық Банк ноталары эмиссиясының көлемі 2011 жылғы наурызбен салыстырғанда 2011 жылғы сәуірде 30,8% қысқарды және 306,5 млрд. теңге болды.

Қысқа мерзімді ноталардың кірістілігі 2011 жылғы наурыздағы 0,92%-дан 2011 жылғы сәуірде 1,17%-ға дейін төмендеді.

Айналыстағы ноталардың көлемі 2011 жылғы сәуірдің аяғында 2011 жылғы наурызбен салыстырғанда 0,2% өсті және 1451,5 млрд. теңге болды.

6. Банкаралық ақша нарығы

2011 жылғы сәуірде орналастырылған банкаралық депозиттердің жалпы көлемі 2011 жылғы наурыздағымен салыстырғанда 22,4% азайды және баламасы 2570,2 млрд. теңге болды.

Орналастырылған банкаралық теңгелік депозиттердің көлемі 23,8% азайды және 1317,9 млрд. теңге болды (орналастырылған депозиттердің жалпы көлемінің 51,3%). Бұл ретте орналастырылған банкаралық теңгелік депозиттер бойынша орташа алынған сыйақы ставкасы сәуірде 0,59%-дан 0,63%-ға дейін өсті.

Ұлттық Банктің банктерден тартқан депозиттерінің көлемі 2011 жылғы сәуірде 2011 жылғы наурыздағымен салыстырғанда 25,0%-ға 1273,9 млрд. теңгеге дейін азайды.

2011 жылғы сәуірде наурызбен салыстырғанда орналастырылған доллардағы депозиттердің көлемі 25,9% азайды және 6,9 млрд. АҚШ долл. болды (орналастырылған депозиттердің жалпы көлемінің 38,9%). Орналастырылған доллардағы депозиттер бойынша орташа алынған сыйақы ставкасы наурыздағы 0,30%-дан 2011 жылғы сәуірде 0,10%-ға дейін азайды.

2011 жылғы сәуірде еуромен орналастырылған депозиттердің көлемі 3,2% ұлғайып, 1,0 млрд. еуро болды (орналастырылған депозиттердің жалпы көлемінің 8,2%). Еуромен орналастырылған депозиттер бойынша орташа алынған сыйақы ставкасы 0,60%-дан 0,95%-ға дейін өсті.

Рубльдегі депозиттерге орналастыру көлемі аз ғана мөлшерде қалып отыр – орналастырылған депозиттердің жалпы көлемінің – 1,7%-ы.

Шетел валютасындағы банкаралық депозиттердің үлесі 2011 жылғы сәуірде орналастырылған депозиттердің жалпы көлемінен 47,8%-дан 48,7%-ға дейін өсті. Резидент емес банктерде орналастырылған шетел валютасындағы депозиттердің үлесі 47,2%-дан - 48,6%-ға дейін өсті.

7. Депозит нарығы

Резиденттердің депозиттік ұйымдардағы депозиттерінің жалпы көлемі 2011 жылғы наурызда 7826,7 млрд. теңгеге дейін, 4,2%-ға өсті (жылдың басынан 5,8% өсті). Заңды тұлғалардың депозиттері 5550,0 млрд. теңгеге дейін 5,4% көтерілді, жеке тұлғалардың салымдары 2276,7 млрд. теңгеге дейін 1,3% өсті.

2011 жылғы наурызда шетел валютасындағы депозиттердің көлемі 2459,6 млрд. теңгеге дейін 4,2% төмендеді, ұлттық валютадағы депозиттердің көлемі 5367,1 млрд. теңгеге дейін 8,5% ұлғайды. Теңгедегі депозиттердің үлес салмағы 2010 жылғы желтоқсанмен салыстырғанда 2011 жылғы наурызда 65,0%-дан 68,6%-ға дейін көтерілді.

Халықтың (резидент еместерді қоса алғанда) банктердегі салымдары 2011 жылғы наурызда 2329,6 млрд. теңгеге дейін 1,2% көтерілді. Халықтың салымдары құрылымында теңгедегі депозиттер 1326,9 млрд. теңгеге дейін 2,3% ұлғайды, шетел валютасындағы депозиттер 1002,7 млрд. теңгеге дейін 0,2% төмендеді. Нәтижесінде теңгедегі депозиттердің үлес салмағы 55,5%-дан 57,0%-ға дейін көтерілді.

2011 жылғы наурызда банктік емес заңды тұлғалардың теңгедегі мерзімді депозиттері бойынша орташа алынған сыйақы ставкасы 3,0% (2010 жылғы желтоқсанда 3,4%), ал жеке тұлғалардың депозиттері бойынша 8,4% (8,8%) болды.

8. Кредит нарығы

Банктердің экономиканы кредиттеуінің жалпы көлемі 2011 жылғы наурызда 7665,9 млрд. теңгені құрай отырып, 0,8% көтерілді (жылдың басынан 0,9% өсті).

2011 жылғы наурызда ұлттық валютадағы кредиттер көлемі 4519,6 млрд. теңгені құрай отырып, 1,6% өсті, шетел валютасындағы кредиттер 3146,3 млрд. теңгеге дейін 0,2% төмендеді. Теңгедегі кредиттердің үлес салмағы 2010 жылғы желтоқсанмен салыстырғанда 2011 жылғы наурызда 57,7%-дан 59,0%-ға дейін көтерілді.

Ұзақ мерзімді кредиттеу 2011 жылғы наурызда 6425,0 млрд. теңгеге дейін 0,9% көтерілді, қысқа мерзімді кредиттеу 1240,9 млрд. теңгеге дейін 0,6% ұлғайды. Нәтижесінде ұзақ мерзімді кредиттердің үлес салмағы 2010 жылғы желтоқсанмен салыстырғанда 2011 жылғы наурызда 83,6%-дан 83,8%-ға дейін көтерілді.

Занды тұлғаларға кредиттер 2011 жылғы наурызда 5553,9 млрд. теңгені құрай отырып 1,1% өсті, жеке тұлғаларға кредиттер 2112,0 млрд. теңгеге дейін 0,2% көтерілді. Жеке тұлғаларға кредиттердің үлес салмағы 2010 жылғы желтоқсанмен салыстырғанда 2011 жылғы наурызда 27,9%-дан 27,6%-ға дейін төмендеді.

Шағын кәсіпкерлік субъектілерін кредиттеу 2011 жылғы наурызда 1285,3 млрд. теңгеге дейін 3,3% төмендеді, бұл экономикаға кредиттердің жалпы көлемінің 16,8% құрайды.

Салалық бөлуде банктердің экономикаға кредиттері бойынша неғұрлым айтарлықтай сома сауда (жалпы көлемдегі үлесі 21,3%), құрылыс (19,4%), өнеркәсіп (9,9%) және ауылшаруашылығы (3,4%) сияқты салаларға тиесілі.

2011 жылғы наурызда банктік емес занды тұлғаларға ұлттық валютамен берілген кредиттер бойынша орташа алынған сыйақы ставкасы 12,2% (2010 жылғы желтоқсанда 12,9%), жеке тұлғаларға берілген кредиттер бойынша 20,9% (20,3%) құрады.

8. 2011 жылғы 1-тоқсанда жүргізілген экономиканың нақты секторы кәсіпорындары мониторингінің нәтижелері туралы

Экономиканың нақты секторындағы ахуалды бағалау мақсатында 2011 жылғы сәуірде 2011 жылғы 1-тоқсан үшін кәсіпорындарға кезекті мониторинг жүргізілді. Мониторингке қатысқан, ел экономикасының негізгі салаларын білдіретін кәсіпорындардың саны 2010 жылғы 4-тоқсан бойынша пікіртеріммен салыстырғанда 2171-ден 2222-ге дейін, оның ішінде орта және ірі кәсіпорындар саны 1303-тен 1331-ге дейін ұлғайды.

2011 жылғы 1-тоқсанда шаруашылық қызметіне теңгенің АҚШ долларына қатысты (2010 жылғы 4-тоқсандағы 7%-дан 10,4%-ға дейін) және Ресей рубліне қатысты (4,8%-дан 5,3%-ға дейін), ал еуроға қатысты төмендеген (5,3%-дан 4,6%-ға дейін) бағамының өзгеруі оң әсер еткен кәсіпорындардың үлесі ұлғайды. Бұл ретте шаруашылық қызметіне теңгенің Ресей рубліне қатысты бағамының өзгеруі теріс әсер еткен кәсіпорындардың біршама ұлғайды (2010 жылғы 4-тоқсандағы 9,8%-дан 15,1%-ға дейін). Кәсіпорындардың көпшілігіне (60,2%), бұрынғыша теңгенің қарастырылып отырған валюталарға қатысты бағамының әсері болған жоқ.

Кәсіпорындар алған банктердің теңгедегі және шетел валютасындағы кредиттері бойынша орташа пайыздық ставкалары 2010 жылғы 4-тоқсандағы 14,1% және 12,1%-дан тиісінше 2011 жылғы 1-тоқсандағы 13,8% және 11,2%-ға дейін төмендеді.

Шетел валютасындағы кредиттерді берудің орташа мерзімдері ұлғайды (34,1 ай). Осының салдарынан олардың кәсіпорындар қалаған (30,5 ай) мерзімдермен біршама жақындауы байқалды.

Кәсіпорындардың кредиттік белсенділігі қалпына келуде: әрбір бесінші кәсіпорын 2010 жылғы 1-тоқсанда банк кредитін (20,5%) пайдаланды. Алайда дағдарысқа дейінгі деңгейге әлі қол жеткізілген жоқ (2007 жылы - 32,8%, 2008 жылы - 26,5%), бұл банктердің клиенттерді таңдау кезіндегі сақтық саясатына байланысты. Оған қоса, кәсіпорындардың қаржы жағдайының жақсаруы олардың көбіне айналым қаражаты мен

инвестицияларды қаржыландыруы кезінде өз қаражатымен шектелуіне мүмкіндік береді. Ағымдағы жылдың қаңтар-наурызында кәсіпорындардың 75,6%-ы кредит алу үшін банктерге өтініш білдірген жоқ.

Нақты сектордағы инвестициялық белсенділік жақсы деңгейде сақталып отыр: кәсіпорындардың 40,1%-ы ғана инвестицияларды жүзеге асырған жоқ. Бұл ретте негізгі қаражатты қаржыландыру үшін банк кредитін пайдаланған кәсіпорындардың үлесі 2010 жылғы 4-тоқсандағы 3,7%-дан 2011 жылғы 1-тоқсандағы 4,2%-ға дейін өсті.

2011 жылғы қаңтар-наурызда кәсіпорындардың дайын өніміне сұраныс тұтастай алғанда нақты сектор бойынша іс жүзінде өзгерген жоқ, сұраныстың кейбір өсуі «өндіруші өнеркәсіп», «электр энергиясын, газды және суды өндіру мен бөлу», «көлік және байланыс» салаларында байқалды. Осы кезде 2010 жылғы 1-тоқсанға қарағанда сұраныс барлық салалар бойынша біршама өсті. 2011 жылғы 2-тоқсанда жағдайдың біршама жақсаруы күтіледі: сауалнамаға қатысқан кәсіпорындардың 27,6%-ы сұраныстың өсуін (2011 жылғы 1-тоқсанда - 21,8%), азаюын – тек 7,7%-ы күтеді.

Кәсіпорындардың дайын өніміне бағалар 2011 жылғы 1-тоқсанда өткен тоқсанмен салыстырғанда анағұрлым жоғары қарқынмен өсті: кәсіпорындардың 30,4%-ы бағаның өскенін (2010 жылғы 4-тоқсанда – 25,9%) және тек 5%-ы төмендегенін атап өтті. Кәсіпорындардың көбі бағаның өзгермегендігін (64,2%) атап өтті, алайда мұндай кәсіпорындардың үлесі әр тоқсан сайын төмендеуде.

2011 жылғы 1-тоқсанда жоғары деңгейде қалып отырған өткен тоқсандағымен салыстырғанда шикізат пен материалдар бағасының өсу қарқыны біршама көтерілгендігі байқалды. Бағаның өсу қарқынының ұлғаюы «ауыл шаруашылығы, аңшылық және орман шаруашылығы» және «көлік пен байланыс» салаларын қоспағанда, барлық салаларда байқалды. Шикізат пен материалдар бағасының өсуін респонденттердің 55,9%-ы (2010 жылғы 4-тоқсанда – 50,1%) және тек 1%-ы төмендеуін атап өтті. Бағаның өзгермейтіндігін кәсіпорындардың 35,1%-ы атап өтті.

Экономика нақты секторының қаржы жағдайы жақсарды: сатудың орташа рентабельділігі 49,7% (2010 жылғы 4-тоқсанда 43,5%) болды, бұл, біріншіден, және негізінен, мұнай бағасының өсуіне байланысты өндіруші өнеркәсіптегі өнімді сатудан түскен кірістің айтарлықтай ұлғаюымен, ал екіншіден, сату көлемі өскен не өзгермеген кәсіпорындар санының (2010 жылғы 4-тоқсандағы 68,1%-дан 2011 жылғы 1-тоқсанның қорытындылары бойынша 71,9%-ға дейін) айтарлықтай ұлғаюымен байланысты.

Ағымдағы жылдың 1-тоқсанының қорытындылары бойынша экономиканың нақты секторындағы жұмыспен қамтылғандармен жағдай жақсарды: 2010 жылғы 4-тоқсанмен салыстырғанда жұмыспен қамтылғандар саны ұлғайған не өзгермеген кәсіпорындардың үлесі біршама өсті және 66,%-ды (2010 жылғы 4-тоқсанда- 63,7%) құрады.